

Keists pasēmatīms

Ka bovau mažiesnis, negaliedavau apsēētē be žvejības. Dēinū dēinas kiurksuodavau pri Skouda jūras, retā kumet dēdesnē žuvi tesogaudavau, bet vondou traukdava kap magnets. Net sapnie meškerēs ēš ronkas nepaleisdavau.

Dabarčiou, ka jau ūgteliejau, žvejuotē retiau benoeino, nes mergelkas pradiejē rūpietē. Vēina tuokē ēsēkliuopēnau – akiū nebgalio atētrauktē, vuo anā pasakītē aple sāva jausmus nedrēso! Ka ēlgesē suopuli būtom lēngviau ēštorietē, pasējiemiau spiningēnē meškerē ēr ēšmuoviau pri Skouda jūras nervu noramintē. Tuo paprūdē krontēnē betuonouta ēr šēik tēik slīdi... Atsēstuojuau ont anuos, švēlpt spininga i vondini. Patrauko vēina karta, ontra... Ont tuos mona blēzgs net nospruogusi līdeka nepasēkabēn! Ronkas ēsmēlka, spininga besvaidont. Atsēsiedau pasilsietē.

Besiediedams viel aple sāva slapta meilē pradiejau vuožuotē. Mēslējo, kap būtom gerā, je mona mergēlē dabar če atētom. Tuokiuo ruomantēškuo aplinkuo pasēpasakuočiau, ka ana monēi žiaurē patink, ka negalio be anuos ramē gīventē... Ek, atsēdosau... „Zoikē svajuonēs“, – pamēslējau ēr viel švīsteliejjau spininga. Besvēisdams netičiuom pasēveiziejuau atgal – veizo – mona mergēlē atein pri jūras. Ēr tou patio muomēnto līdeka nosētvierē mona blēzge. Nebžēnau ni kou bedarītē – ar so panelē sveikintēis, ar līdeka loptē ēš vondēns laukuon. Vuo ta bestējē līdeka tiktās tīst muni so vēsa meškerē ēr ivertē i jūra... Junto, kap so vēso pēlvo golous i vondini...

Kap tuoliau bova, nebatmēno nieka, ka atsēpeikiejau, veizo, bestuovis ēsēbrēdēs lig pat bombas vondēnie. Vuo ont kronta stuov mona svajuoniu mergēlē so līdeka ronkuos ēr joukas, sakīdama „labas“. Aš anā ērgi tou pati žuodi pasakiau... Tuoks tad bova pērmāsis vedoms pasēmatīms. Par ontra pasēmatīma līdeku vedo nebgaudiev – sogalvuojuov šīn tou iduomiau.